



Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Akilerartarnermut Atugarissaarnermullu Isumalioqatigiissitap akilerartarnermut atugarissaarnermullu immikkoortunut innersuussutaanik aallaaveqartumik aaqqissuusseqqinnernik suliaqarnernik aallartitsinissamik Naalakkersuisut peqquneqarnissaannut Inatsisartuni aalajangiiffigisassatut siunnersuut. Sulinissaq immikkoortunik ilanngussaq 1-mi taaneqartunik aallaaveqassaaq. Sulineq 2021 naatinnagu naammassineqareersimassaaq.

(Inatsisartunut ilaasortaq Múte B. Egede, Inuit Ataqatigiit)

Tunggavilersuut:

Inuiaqatigiinni politikimillu ingerlatsisuni sivisuumik akilerartarnermut atugarissaarnermullu tunggasuni aaqqissuusseqqittoqarnissaanik pisariaqartitsineq oqallisigineqarpoq. Aaqqissuusseqqinnerit ilaatigut immikkoortut pineqartut ataqatigiissinneqarnerisigut, ullutsinnullu naleqqussarnerisigut, inatsisit sinaakkutaasut inunnut ataasiakkaanut pisortanullu paasiuminarnerulernissaat, inuillu ataasiakkaat atugaasa oqinnerulersinneqarnissaat kiisalu allaffissornerup annikillisarneqarnissaa qulakkiissavaat.

Aaqqissuusseqqinnerni pigissaarnerup atugarissaarnerullu nukittunerulersinneqarnissaa, naligiinnerulernermik qulakkeerinnissaaq, allaffissornermik annikillisaanissaaq siunissarlu ungasinnerusoq eqqarsaatigalugu inuiaqatigiit atugartuut aningasalersorneqarnerata qulakkeernissaa pingaarnertut siunertaapput.

Akilerartarnermut Atugarissaarnermullu Isumalioqatigiissitap 2009-mi ukiakkut pilersinneqarpoq, isumalioqatigiissitarlu 2011-mi marsimi isumaliutissiissumminik saqqummiussivoq.

Akilerartarnermut Atugarissaarnermullu Isumalioqatigiissitap kaammattuutai ataasiakkaat ukiuni kingullerni aallartinneqartarput. Taamaattoq Akilerartarnermut Atugarissaarnermullu Isumalioqatigiissitap isumaliutissiissutaa aallaavigalugu annertuunik ataqatigiissunillu aaqqissuusseqqinnernik suliniutinik aallartitsisoqanngilaq.

Aningasaqarnermut siunnersuisooqatigiit 2019-mut nalunaarusiaanni ilaatigut ima allassimasoqarpoq: *”Isumaginnittoqarfik tamarmiisoq ataqatigiissillugu aaqqissuuteqqinneqartariaqarpoq. Ikiorsiissutit tapiissutillu katitigaaneri innuttaasunut sullissisunullu paatsiveerunnarpallaarput paasiuminaallutillu. Ikiorsiissutit assigiinngitsut ataqatigiinnerat ersarluppoq¹ ...”*

¹ https://naalakkersuisut.gl/~media/Nanog/Files/Attached%20Files/Finans/GL/Oekonomisk_raad/G%C3%98R%202019%20KAL.pdf

